

Naqqiut

Kalaallit Nunatsinni ilinniarfinni tamani ilinniartut pisariaqartitsineq naapertorlugu danskisut pikkorissarneqarnissamik periarfissinneqaqqullugit Ilinniartitaanermut Pilersaarutaat II-mut Naalakkersuisunit qulakkeerneqaqqullugu Inatsisartut aalajangiiffigisassaattut siunnersuut.

(Inatsisartunut ilaasortaq Mimi Karlsen, Inuit Ataqtigiit)

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

ISUMALIUTISSIISSUTAA

Aalajangiiffigisassatut siunnersuutip aappassaaneerneqarnerani saqqummiunneqartoq

Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq, Ruth Heilmann, siulittaasoq (S)

Inatsisartunut ilaasortaq, Per Berthelsen, siulittaasup tullia (S)

Inatsisartunut ilaasortaq, Mimi Karlsen (IA)

Inatsisartunut ilaasortaq, Harald Bianco (IA)

Inatsisartunut ilaasortaq, Randi Broberg (PI)

Siunnersuut UPA 14-mi ulloq 14. maj 2014 siullermeerneqareemat Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamit misissorneqarpoq.

Siunnersuutip imarisai siunertaalu

Ilinniartut ilinniarnermut atatillugu Danskisut oqalussinnaalernissamat pisariaqartumik ikiorserneqartarnissaat siunnersuutip siunertaraa. Siunnersuuteqartup anguniagaraa ilinniagaqarfiit siunissami ilinniartunik danskisut ilinniartitsisalernissamik pisussaaffeqalernissaat, taamaalillutik ilinniartut danskisut ilinniartitsissutitut malinnaanissamat periarfissaat annertusineqassalluni.

Siunnersuutip Inatsisartuni siullermeerneqarnera.

Ilaatigut Højskolini Efterskolinilu ilinniartut ilinniaqqiffinni ilinniarnissamat piareersimanissaat siunertaralugu danskisut ilassutitut ilinniartitsineq

aallartinneqareersimasoq Naalakkersuisumit oqaatigineqarpoq. Ilinniagaqarfiit soorlu Niuernermik Ilinniarfik Ilinniarnertuunngorniarfillu aamma ilassutitut danskisut ilinniartitsinermi suliassaq aallartereersimavaat. Kiisalu ilinniartitaanermut pilersaarut II-mi ilanngunneqarsimavoq faginik ataasiakkaanik qaffassaanissamut amigaaqartunut ukioq ataaseq tunngaviusumik ilinniartitsineq.

Partiini oqaaseqartartut tamarmik siunnersuut taparserpaat.

Ataatsimiititaliap siunnersuummik suliarinninnera

Siullertut ilinniagaqarfiutitta arlallit tungaaniit suliniuteqarnikkut ajornartorsiut qulaajarniarlugu pilersaarusiortluni aallartittoqareersimanera ataatsimiititaliamit nuannaarutigineqarpoq. Ilinniagaqarfiit ilinniartitsinermit atortuminnik taamatut ingerlatsisimanerat – sulilu ineriartortitsinerat – ataatsimiititaliamit annertuumik tutsuigineqarpoq, taamaalillutillu ilinniartut ilinniakkaminnut tunngasunik oqaatsinik nutaanik atuisinnaaleqqullugit.

Aappaattut, ilinniagaqarfiit suliniutaasa ilinniartunut sunniuteqartarnerisa ilinniagaqarfiit inerniliisarnerannut malinnaanissaq ataatsimiititaliamit pingaartinneqarpoq. Imatut oqaatigalugu, misilittakkat suut – minnerunngitsumilli unammilligassat suut – ilinniagaqarnermut ikiorsiissutitut ilassutitut danskisut ilinniartitsinermit atatillugu misigisimaneraat.

Naggasiullugu ataatsimiititaliamit pingaartinneqarpoq, suliassaqarfimmut malinnaanissaq, pisariaqartitsineq tunngavigalugu ataatsimoorussamik siunissami suliniuteqarnissaq aallartinneqarsinnaaqullugu. Tamatumunnga atatillugu ataatsimiititaliamit pingaartinneqarpoq, suliniuteqarfiup naammassineqarnissaa Naalakkersuinermit suliaqartut akisussaaffigissagaat.

Siunnersuutip pisortanut aningaasaqarnikkut allaffissornikkullu kingunissai:

Siunissami suliniutissap suliarineqarneranut atatillugu aningaasartuuteqartoqassasoq siunnersuuteqartoq isumaqarpoq. Pilersaarutitut ingerlareersunut sinaakutissat iluini aningaasartuutissatut pisariaqartinneqartut matussuserneqarnissaat ataatsimiititaliamit naatsorsuutigineqarpoq, taassuma ataani, ilinniartitaanermut pilersaarut II-p suliarineqarneranut atatillugu.

Inassuteqaat

Siuliani oqaatigineqartut siunnersuummillu siullermeerinermi oqaaserineqartut tunngavigalugit siunnersuut akuerineqassasoq ataatsimiititaliamit isumaqatigiittumit inassutigineqarpoq.

Taamatut oqaaseqarluni ataatsimiititaliap siunnersuut aappassaaniigassanngortippaa.



Ruth Heilmann




Per Berthelsen



Mimi Karlsen



Harald Bianco



Randi Broberg